



三十九年正月江蘇巡
按周厚培家
藏書部
壹本

華鄂堂詩藁卷一

古婁周彝策銘

詠史

子房人中龍渺小一孺子報韓計不成潛跡遊下邳天
 授隆準公密策投魚水指麾宇宙間廓清不一紀回首
 顧伊呂千載屹鼎峙辟穀從赤松豈必求不死神龍凌
 天衢天矯藏其尾鄴侯歸衡山其意亦如此
 子胥志復讐一怒終覆楚三戰入郢都休軍章華府鍾
 建負季芊王逃雲夢滸雪恨在窮泉可以謝兄父秦庭



不識一

孫壯藏書印

師一出幡然遂旋旅吾力豈不強志伸氣亦吐與友有成言人各忠所主茲名既已成彼事亦復舉兩行天地間浩然並千古

信陵好賓客車騎過夷門睥睨立市中執轡色逾溫邯鄲苦炊骨俱死不獨存屠亥椎晉鄙秦軍爲之奔趙王獻五城終宴不忍言迴兵救大梁國安名亦尊是時佳公子惟有一平原田文營三窟黃歇幸李園身死祚不永齷齪難並論

季子黃金盡骨肉還見欺買臣困負薪伉儷去不歸一

朝綰相印匍匐多光輝煌煌會稽守故妻泣路岐富貴驕婦人恐爲識者嗤量小器易盈安能保高危功名究無成殺身亦其宜

南陽一臥龍三顧扶炎劉火井噓餘燼赫然赤光浮指顧定大計功豈蕭曹儔談笑揮白羽名士多風流當其受付託謹慎能綢繆才大心逾小智遠慮必周文舉亦人豪踈畧終見收後惟王景畧卓犖近前修儉父多大言瓌瓌何足謀

斜塘

粵昔神禹漸東海力驅震澤而注之歲久三江失故道
吳淞一線安能支獨有歇浦供委洩洪流吐納苦其遲
蟠胸數里輒一曲兩岸隔閩多嶮巖偶駕扁舟出斜塘
布帆高掛浦之湄須臾水聲忽趨怒惡風黑浪爭奔馳
雷公憑憑玉女笑翠旗雲車紛陸離天地黯慘無顏色
掀翻數丈老蛟螭人生性命劇可憐咨爾屏翳何好奇
世間萬事難預料欲渡不渡將待誰石梁丈人恃忠信
歷盡險阻乃可知方寸湛然終不亂雖有風波安所施
不然磊落丈夫子不及斜塘一篙師

恭述

旌表貞節祖母張太孺人一百韻

貞行垂家乘清風動廟廊天邊今雨露泉下昔冰霜潛
德光初發徽音矢勿忘粵稽我王母世系自文昌鸞鷲
曾占夢鱸魚即故鄉青錢原錯落金鑑迥輝煌盡飾紅
椒壁聯居白玉堂青冥隱老鳳丹穴產雛凰內則嫺殊
早閨中秀允臧閒窓工組紵雅步節珩璜莫語桐絃折
寧知柳絮颺十年貞不字二族定爲祥警戒星猶爛吞
嗟夜未央鹿車堪共挽鴻案儼相莊婉婉羞蟬翼殷勤
事蟹筐棗榛虔饋摯蘋藻潔烝嘗井臼靡寧晷機絲有

報章家貧多輻輳親老劇彷徨逮養糊糲粥安能足稻
梁牛衣供綵服鵬翻困榆枋憔悴方營室摧頽忽壞梁
方寧遇俞扁疾已入膏肓和藥心先碎焚香首屢捨此
生何慘慘彼昊竟茫茫泣下淒風雨悲來絕水漿人間
輕棄擲泉路擬徜徉堂上頭逾白懷中口尚黃一門弔
形影三世苦扶將無母嗟何恃餘生忍自戕慈言此最
切痛定迺差強默默深銜恤依依各斷腸暫將狗節緩
且以撫孤償畫荻聊當筆收螢每入囊蕭晨繙蠹簡永
夜課青箱卜宅鄒鄰近移居歇浦傍炊烟冷野竈漚苧

沒方塘序肅驚寒雁村孤急暮蜚周遮蛛蔽牖町疇鹿
來塲徑茁蓬蒿滿庭餘松菊荒登堂遺縞紵連袂映圭
璋截髮張華讌烹鮮送遠裝他山効攻玉岐路得亡羊
密識知英傑有聞共頡頏勉旃語久咽愁絕淚盈眶那
復丁時變中間更慘愴凶年多盜賊白晝劫衣糧天畔
連烽火海隅徧斧斨潛身竄荆棘避禍脫風檣獨力持
門戶驚心撤土桑拮据惟十指慮患有千瘡集蓼辛誰
喻茹荼苦不妨西鄰縱受福東壁敢希光畜我應難卒
寧親謝未遑清溫恪寒暑統紉奉姑嫜北海思填土南

陔代獻觴終然侍几杖猶自作羹湯婚冠經時畢興居
迄小康未曾披繡縠從不厭糟糠苦節梁高行憂勞魯
敬姜恩勤秉家計匍匐救民喪有利旋歸復始微久克
彰壽當周甲子家並祝陵岡雖乏青麟脯還餘黃菊粳
含飴欣繞膝捧饌競牽裳羔雁紛交錯衣冠實濟蹌周
親歡有慶君子頌無疆念昔方爲婦早年號未亡半生
幾竭慶何事不悽惶趙朔孤終立于門澤漸長吾身頻
死地爾輩出蕭牆天意非云薄予懷詎敢望九原真面
目卅載暫參商長夜夫何恨衰齡已自量刀圭餘藥餌

七箸置膏腳同穴盟方遂初心誓不爽翻飛青鳥使哀
絕白鳩郎雲霧沉西郭松杉暗北邙牛眠卜窀穸馬鬣
峙玄房歲歲歌黃鵠時時弔白楊 盛朝崇節義姱行
特揄揚下里欽賢媛當塗重義方令聞延黨族建議肇
膠庠熊軾標孀閭烏臺達 帝閭表閭魏檝棹 宸翰
妙琳瑯日返虞淵旭寒回黍谷陽冥途如可作薄俗大
爲坊李密情何極臯魚恨欲僵不材漸孝筭餘蔭類甘
棠稽顙投諸地呼號訴彼蒼古人誰不死吾祖獨堪傷
有弟同悲憤窮途枉激昂比年梟木絕每憶野芹香辜

負先留硯依稀舊繞牀何當少豎立敢自究倫常慘矣
維先烈巍然植大綱閨幃鍾間氣山岳挺孤芳淚結千
年碧心凝百煉剛了無巾幗氣須列聖賢行金石光彤
史松筠照縹緗銜哀何以述珥筆未能詳

先王母太孺人姓張氏 誥贈通議大夫吏部左侍
郎諱尚文公女天性明敏端恪幼習女工兼通孝經
內則諸書年二十歸吾王父食貧力作相對晏然後
八年王父見背時家嚴甫八歲叔氏甫六歲太孺人
哀痛絕粒將以身殉曾王父母諭以徒死不撫孤
因勉進溢米朝夕勤劬延師致脯紡績是具攻苦敷
淡經營婚娶中更喪亂流離轉徙門戶幸無恙皆太
孺人力也贈通議公憐念災獨欲載與俱歸太孺人
以舅姑在堂義難遠離堅辭父命奉曾王父母儼居
上海之三林塘生事死養竭誠盡志安居鄉僻垂三

十年復遷郡城西郭時年已六十矣又二年寢疾卒
辛酉冬撫臣上其事請 旨建坊蒙 恩報可今已
載在省誌徵入國書孫彝謹述梗
槩如左以俟立言君子有所採焉

秋海棠詩

小齋前遍栽秋海棠有紅白二種深秋作花參差
掩映雖兩美必合而鮮素殊觀假辭贈荅聊助歡
賞云

紅贈白

萬物求同氣結交恒相因爾我連根葉比鄰猶一身如
何各異色渺渺難並陳秉質一差池邈若商與參世人
取悅目艷冶每見珍胡為獨矯分守真含苦辛願君速

騰化永言復斯箴

白荅紅

天道崇自然古人斥間色與子相遇來少長同形質繁
華中道變丹鉛事榮飾駝顏日既醉見妬寧終極淡泊
性所安詎敢矜奇特努力各自保謝君慰沉默

再贈

楊子遇素絲悲來淚未輟入染易爲汙守朴毋乃拙又
聞郢中曲寡和由白雪今子皎然姿氣與冰霜冽獨立
常違世安所得懽悅我貌豈云工方子未爲劣子意何

太偏視子態彌潔一朝飄風至爾我同奄滅芳妍貴及
時念茲應騷屑

再荅

今日歲云秋白帝零清露所以廣寒宮衣裳尚霓羽予
生及良時任質獲天趣秋容宜慘淡春華何足慕大造
無私覆姿性惟所具我無厭子妍子無奪我故萬物有
代終一去不復任顧影竭陋姿無喜亦無懼區區致相
於披懷見情愫

次京口遇驟風雨維舟以待

馮夷使者來海濱
朱衣白馬氣何雄
兼天黑浪沉江岸
滿眼黃雲罩梵宮
得水蛟龍終變化
成群獼獼失虛空
須臾日影滄洲上
天際垂垂一暮虹

春日

春日麗以和
凡卉滋茂陰細雨
滌塵囂微風來好音清
晨催我起樹杪喧鳴禽
憑軒長眺望始知春已深
冉冉去時速憂思誰能禁
榮華一哀歇憔悴百相侵
莫言春日好春氣傷人心

寄懷永嘉廣文胡兼山先生

東甌山勢最磐碧
駢路希投尺一緘
詩律到今加細否
蓬蒿滿徑爲誰芟
綠蘋應薦文山廟
青蓋時過謝客巖
我欲訪君看蜃氣
秋風將掛越溪帆

謁孝陵

龍虎千年宅乾坤
百戰功宏規開浩劫
佳氣本青葱六合歸
隆準三泉築閼宮
石麟秋慘淡金虎夜微濛
古殿鼉鼉竄幽房
熠燿通諸壇嚴從幕
陪祀報群公隔代樵蘇禁
今皇典禮崇御題
標玉匣宸翰秘紗籠
馬鬣無新鬼烏號有舊弓
神靈猶在沛文子竟遷豐
北顧山河

異南朝門第空可憐伏謁者禾黍正秋風

燕子磯

清秋猶不去徙倚此何心古洞巢棲久寒江飲啄深朝嵐濕翠羽斜日暎紅襟豈獨悲王謝興亡自古今

贈鄭宣成

有美挺人瑞清真備高深結客輕千里來此茸城陰伊余久閉關兼為夙疾侵之子幸不遺跽然空谷音所志在古昔抗言非近今春華誰不慕歲寒良可任緬彼浮雲翔奄忽踰嶽岑迅飈適相會邈若商與參起視庭雪

白庶以披素心終當慰離索常此代兼金

當秦中吟

予少長鄉國甲子乙丑間薄遊燕薊聞見所及慨我寤歎戊辰季春雨窓無事忽忽入懷因做白少傅作秦中吟題仍舊名意或別發聊以誌感不計工拙也

議婚

生女亦勿喜生女亦勿悲父母各自愛女生命難移生為富家女令顏世所期生為貧家女戚戚將待誰富家女二八窈窕美容姿雲衣墮馬髻照耀大路岐使君見之笑蹇脩前致詞門楣兩相當許嫁恐後時北里貧家

女終日歛蛾眉膏沐不遑理日暮常苦飢標梅忽已盡
嘉會何遲遲綠窓鑒明月顧影竊自疑人生洵有命良
媒安所施十年貞不字古人洵可師

重賦

吾鄉田賦重循漸由故明士誠據東吳數載始削平太
祖有餘怒遷之於民生官稅按私籍任意以取盈歲久
爲成憲後來孰能輕國朝亦因之故事難驟更經制
定兩稅本以蘇愚氓溝壑有起色其奈屢用兵大軍儲
糗糧官府力奉行里胥賫嚴檄閭左人戰驚典衣逼我

納鬻子非人情所幸天厭亂宇內掃攬槍皇皇聖天
子如傷中心誠詔捐今年租不謀於公卿父老扶杖
觀感泣以屏營小民志願奢永永著爲令九閭聞不
聞負耒且歸耕

傷大宅

朱門臨大道結構山之麓中堂高拂雲粉墻周四角井
幹窓交䟽閣道紆且複洞房變陰陽冬夏移寒燠清池
散朱英重岩叢秋菊其中有貴人鮮衣擁隸僕一讌幾
十金華燈照絲竹門前填車馬屋後連艫舳念彼公侯

家豈無貧賤族鷄衣不蔽體望風先匍匐登堂有榮光
敢希分天祿人生無百年貨賄恣所贖不見顧家園滿
地生首藿

傷友

栖栖陋巷士早歲苦數奇慷慨出門去短褐遊京師懷
中刺漫漶將以投所知所知既貴顯趨操素不虧置身
青雲端雨露惟所施朝從長安道側聞五馬嘶故人上
頭坐望見顏忸怩故人與我厚更須慎其儀須臾倏遠
去匍伏空爾爲在昔刎頸交干戈輒相隨今日膠漆契

棄捐固其宜歸讀夸吾傳涕淚長吁戲

台致仕

俗士據要津暮年戀遠途主恩未放歸垂白多歡娛浩
然欲抽簪臨去還躊躇往在漢西京東海有二疎青宮
重保傅乞身歸田廬賜金日置酒賓客盈庭除老臣終
惠養止足不願餘多財累後人無分賢與愚清風高蟬
冕斯人今則無千載東門外遙遙二大夫

立碑

巍巍南山石取置古道旁上稱功德茂下序謳思長砥

節洵冰蘖撫字誠循良言言皆實跡前無龔與黃受者
無愧赧爲之非悚惶去官未云久功績胡相忘丹篆赫
炫目大篇誰能詳童豎競推仆顛倒入方塘牽挽立高
岬後官事表章但改姓與名善政具芬芳憶昔峴首碑
對此空徬徨近聞貴官去父老喜欲狂一碑不可得默
默更自傷

輕肥

意氣薄雲漢車馬照路衢挽弓下鴻鵠入肆傾醍醐手
中垂玉鞭腰下懸錕鍔自非金吾子毋乃馮子都道逢

七香車目挑千金軀白晝恣劫掠殺人不須吏杜門讀
書客自笑大區區

五絃琴

吾里有金叟寂寞真高士清夜撫枯桐高山與流水一
彈止自娛不入世俗耳近日鼓琴者侯門躡朱履小聲
續續彈低語隔窓紙大聲忽間作勇士赴邊鄙宮商非
一音顛倒由十指座中聞此曲咨嗟再三起金叟未死
前名高正不爾北窓久寥寂古調亦云已

歌舞

黃鐘鳴北里鼎餽陳西鄰冠蓋相追索良會及芳辰將
相盡投轄中有驚座賓妖姬家本趙艷歌聲自秦山橫
壓翠黛香發啓朱脣柳枝何嫋娜白雪迴輕身促膝非
所禁目挑若有神更闌見燭跋四筵樂方新是歲江北
旱道逢餓死人

買花

繁華洛陽道三春車馬填豐臺號尤盛芍藥互爭妍
紅間深紫素白色相鮮一望竟數里馥馥春風前當壚
列酒肆帷帳環水邊內家攜女伴戲遊若神仙盤桓輒

移日雜沓遺金鈿一朶復百朶酬值不計錢若復連株
移泥封同固然年年成故事人人競往還花間一老翁
揮淚獨潺湲家中甑生塵此花姑舍旃

石鼓歌

有周定鼎十葉後中興英哲推宣王蠻荆來威鴻雁集
垂拱坐治開明堂金舄赤芾會東洛千乘萬騎蒐岐陽
焚林搏獸搜鹿虎決水陳魚登鯉魴鑿石作鼓紀駿烈
馳驟三五億載強從官才調風肆好珥筆撰紀工鋪張
詩成雕鑿鈔體格昆吾躍冶銛鋒鋉云是史臣史籀筆

儼如鳳翥鸞騫翔驚潛動蟄鎮山岳金繩鐵索相扶將
秦漢以來不好文千年奇字埋山邱雨淋日炙霜雪打
幸以厚重留天荒昌黎嗜古有淫癖對此不啻珍珠琅
濡染大筆盤硬句關執造化開渾茫聳牙佶屈喻者少
直與此鼓相頡頏皇祐年間置太學神物不壞登巖廊
憶我往歲遊京師塵坩穢雜徒蒼黃蹒跚跛蹙騎不得
徘徊鼓側同鄭昂斜睨文理手捫摸欲讀不讀口蛄蟻
是年甲子冬十月 天王大駕巡淮揚爾時滇黔告洗
甲天戈東指掛扶桑登封不襲梁父禪巍巍直欲躋羲

皇詞臣學士如麻列磊落百十遙相望定當岱山斲巨
石摩畫 聖德抉天章丹書盤結如蝌蚪永與姬室爭
輝光曷爲此事寂不作使我捩眼空徬徨吁嗟鼓詩雖
剥缺參倚心目難遺忘安得摹榻數本貯錦囊下視燕
然之罟等粃糠

遣興

陰寒不信有今日今日淒涼豈偶然梅子熟時晴亦雨
竹窓坐久日如年漫愁客至迷三徑且喜囊看有一錢
聞道前溪新水漲明朝好上釣魚船

雜咏

孔雀東南禽文采紛葳蕤高冠既嵬峩錦衣復陸離翠
屏一以開璀璨世所希延頸忽長鳴俯首向我悲自昔
栖海嶠赤霄任委遲虞人置籠中萬里遠致之幸無飢
與渴毛羽日彫衰奮志欲凌雲一舉觸四垂世人雖見
珍不如歸故坻

盈盈析木津浩浩流素波迢迢牽牛星渺渺隔歲過天
上苦離索良會今如何鵲橋雜沓填龍駕紛逶迤緬彼
閨中女惆悵停金梭永夜設瓜果初筵綺阿儼蛛蜘蛛徒

營營酒醴惟所羅拜跪不憚勞天公靡有他勿復與人
巧人巧亦已多

中庭有茂樹綠葉蔭閒房炎天苦鬱蒸習習來風涼玄
蟬鳴其巔聒耳不可當仰承甘露飲呼吸日月光所居
洵要地意外詎能防舒翅發高唱奮臂虓螳螂呼童驅
之去不忍見殺傷

天際垂雙虹雌雄互相似容色奪鮫綃碧落紛旖旎或
云樞星散俯首飲澗水陰陽非時交穹蒼胡乃爾形質
倏然成下民咸仰視仰視復誰何觸之斷一指皇矣赫

鑒觀弭謗良有以

炎暑久蘊隆皇天豐膏澤清風颯然至陰雲倏已積阿
香推雲車豐隆投鱉石吐火復施鞭宇內紛激射傳聞
震古樹茅屋頓毀折無知亦奚辜巨憝未云獲號令毋
乃乖赫怒竟何益

屋前有隙地學種邵平瓜盛夏齊結實早秋復含葩宿
草纏其根陸間相周遮入眼甚芒刺牽衣恣騰挈祛除
務殆盡勿復留萌芽自顧慙歎息手中無鎬邪
步出城南門蕭蕭多白楊修柯拂雲漢垂蔭滿高崗動

搖生清風老大氣飛揚下有曲欄干四面繞方塘淥池
汎菖菡凌波雙鴛鴦地勢既雄傑洵美殊未央惜哉雨
露恩豈能耐雪霜顧彼榭楠姿慚愧棟與梁

用韻爲楊下人少府題潛籟軒

夙有談玄宅翛然雲水隈花因穿蝶舞酒自換魚來故
墅一年別蒼烟九點開遙思題壁處永夜斷鴻迴

冬月桂集陶

歲月將欲暮清朝起威颺凝霜珍異類百卉具以腓我
屋南窓下卓然見高枝亭亭凌風桂氣力不及衰於今

甚可愛獨樹衆乃奇稟氣寡所諧高風始在茲深得固
窮節誰謂不知時長吟掩柴門一觴聊可揮

二月十八夜觀燈

今夕何夕孤蓬篲酒闌燭跋睡未得條風乍颺月乍高
比屋千人萬人出掀髯縱步一相就長衢燈火明於日
芳苾蘭膏最絕倫龍涎豹髓爭奇特琪樹初開四照花
彩鸞將塌雙飛翼寶幕文屏不夜城石家錦幃無顏色
此時百姓望霓旌此夕燈光未應熄越水吳山樂事多
閭閻鼓舞無終極舉頭莫愁雷雨翻哀絃那顧鬼神泣

著處繁華暫相賞歸來長吟獨抱膝挑盡銀缸夜未央
春來草長轉蕭瑟

玉蘭花

昨歲玉蘭開故人欵我戶今歲玉蘭開蕭然翳環堵昨
歲故人來窓前滴寒雨予時苦伏枕談笑首屢頰當軒
聊命酌乍傾村中醑此花正憔悴相顧氣亦吐憶別何
草草顧影恒踽踽蕭辰撫繁英玉立有誰覩永日惟坐
嘯春言對佳樹有懷宣
成長史

孔雀行

孔雀五載毛羽成色與華萼同敷榮赤霄玄圃莫來往
毳項金尾徒崢嶸籠中顧影無儔匹俛首側立心怦怦
須臾縮頸搖雙翅錦花翠羽迭縱橫大眼連錢小貫珠
短者玉屑長金莖恍如石家錦步障齊紈蜀錦相兼并
復如晉帝琉璃屏風前月下光晶瑩一步兩步屢徘徊
此鳥警急由天生繁華精妙世希有背面不與人相迎
君不見象以齒就焚又不見虎以皮遭抨光芒早自知
韜晦紛紛世網誰能櫻孔雀顧我兩目瞪塌翼宛轉長
悲鳴孔雀孔雀弗重陳古來取禍由指名

落花

白日杲杲天氣濃繁花無數向春風輕寒細雨過疎林
飛來飛去亂殷紅蜻蜓偷睛蝴蝶舞遊絲牽惹隨虛空
春來無事倚脩閣數遍花開與花落花開樹樹競繁華
花落空庭悲寂寞繁華寂寞兩不存眼前得失何須論
獨愁吹入青冥裏飄泊何時歸本根

閏上巳

鋪徑揚花白不盡入簾草色綠全舒窮愁歷歷難驅遣
猶喜今朝再祓除

重送張長史入都兼寄俞蒼文八十韻

往事傷寥寂新顏黯別離君行無計任吾意獨含悲江
 介春光老天邊日影遲戒程雞喔喔載道駟駃駃舞絮
 輕於雪飛花亂似篩水田喧播穀古木嘯黃鸝修竹雷
 抽笋荒村屋覆茨濁醪聊命酌秬米薄供炊岸束黃河
 急雲封太岱移夕陽連野燒廢寺沒殘碑鵬鶚離三伏
 驂騮騁九達丹山翻鷺鷥溟渤徙鯤鯨奚事嗟蓬轉只
 應憶路岐計程君到日屈指夏初時落日金臺好長離
 王竦垂鎮山晴鬣隼內苑水漣漪芍藥開餘圃金魚躍

曲池隔年從未到好景尚如斯邂逅首重聚友朋手共
 持驚看疑是夢回首說相思燒燭攤書卷開筵捧酒卮
 客身日鬪健鄉思夜能支良會知常有崇情倏若遺蒼
 茫南與北惆悵子同彛憶自初連袂相于未佩觿金蘭
 千載契肺腑立談知分密膠投漆情親鍼引磁風騷敦
 夙好藥石茂良規麗日明雕檻溫風過澤陂露華凋碧
 樹雪葉滿丹墀晝炙齊丘轂宵燃漢閣藜學山終起簣
 測海漫持蠡絆驥思騰躍飢鷹待指麾秣陵幾度走棘
 院得頻窺路暗空投壁囊堅竟處錐曳柴成敗北著矢

墮登陴序蕭飄槐葉霜嚴落豈其壯心三尺劍冷眼一
枰碁未敢傷遲暮何須苦鬱伊高朋儼北海盛事亞南
皮月下筵相屬花前帽屐歆蒼苔拂地坐白袷信風吹
刻燭藏鈎巧分闈得句奇卷波徵令急小戶併籌疲往
往場能擅飄飄與未衰飛觥愁轉劇逃席罰馬辭勝賞
良難久歡情未易追一朝雲雨散五載電星馳子歲方
陽月予時乍解維天南目悵望渭北路委蛇寒燠他鄉
隔鶯花舊約虧出門刺已漫索米手無貲但得來禽寄
還悲款段騎無能回谷黍止合採江蘼之子推才俊同

時遇有司芳詞貫金石古調協埴箎國士雲間望才華
筆下摛虎闈資潤飾鸞翮接參差遇敵心無怯封侯數
尚奇愁添潘鬢髮瘦減沈腰肢雞肋原非貴鴻磐實可
儀確然無悶日應是大來期涉世凜懷璧成名類摘髭
有才必挺拔而我竟孤羈千里慚跛鼈三年拂卜龜黃
楊仍厄歲白腋輒吹疵生意終踈放人情強喔咿知心
思管鮑躍冶仰工倕數折江南柳頻迂塞北詩索居嗟
已久含意欲爲誰陳子長洲幕昨張郎洙水湄趾論文
惟弟鼎軒講學但焦熹廣易水悲迢遞燕雲望渺瀰石

交原自素塵袂恐為緇神物行焦尾雄心豈守雌身名
期共泰言行務兼危東閣三秋雨南鄰九月締緬維昔
縞紵雅奉古盤匝自顧窮愁盡如公努力為書成將附
鴈吟畢代歌驪

送陳岞嵐客長洲

陳子結束之長洲雨絲搖颺天光浮柳條老大有誰折
花枝饒笑空我愁岞嵐序予詩云請從此去煩君贈折柳之謠未免有情為予弁浣花之集
相逢忽漫成離席此去清狂豈倦遊別後應須各努力
那堪兩地總悠悠

贈蔡瞻珉

蔡子氣勇決讀破萬卷書下筆良有神揮洒不須史文
力彌強健輒與韓歐俱作詩追三唐雅志盛與初君既
高郢曲胡不棄吳歛鄙姿本燕石咄咄稱璠璣予曰此
不然藉君能吹噓君曰未易易相期十年餘兩人各努
力毋徒守區區古道在贈言此語今人無珍重久要意
使我長歛歎

苦熱同樓叔仲史岱巖作

長夏苦鬱陶日色熾如焚皇天屯膏雨四望彌火雲凡

案既焦灼林臯亦氤氲擬操一葉舟泛彼泖湖瀆綠楊
無鳴蟬青草有聚蚊層冰安可踏攪思徒紛紜遠念荷
戈士萬里行從軍鎧甲生蟣虱隊伍編成群近覩田家
子三伏力耕耘日出久作苦日入負餘曛 至尊軫此
輩減膳矢憂勤桐魚到處削疾雷空砢礧中宵疑滂沱
詰旦仍昕昕腐儒憫時艱相對語前聞雲漢呼何辜牂
羊首已贖幸無當世責胡爲憂孔殷造物忌晏安迫我
以燬氛一坐再三起憔悴力與筋安得靈雨降宇內舉
欣欣

錦石小如錢

錦石來何處皎然白玉盤
芰荷水泐泐榆莢露溥溥
笑爾同朽貫慙予非好官
奚囊正羞溺留取若爲看

百憂集行

男兒有才亦有命躡足青雲意氣橫
不然入山求神仙
脫畧塵網何須競憶昔十五志詩書整頓乾坤雅自信
即今三十不稱意與時俯仰非本性環顧四壁轉蕭條
堪歎衣兼食常併孱軀多病需藥裹瘦妻臥床封雉鏡
生涯憔悴槩如此百憂俱集心恹恹顧我百憂百不憂

人世得失如雲浮鴻鵠垂翅渾野雀騏驥伏櫪隨犂牛
君看古來英雄人終日坎壈老即休

集杜送張子趾肇北行

威鳳高其翔非無千里姿白雀久同林未忍別故枝飄
飄風塵際聚散亦暫時秋色正瀟灑遊子有所之握手
淚再滴不得相追隨明日隔山岳各在天一涯迴風吹
獨樹慘慘中腸悲發聲爲爾吞開懷無媿辭烈士惡苟
得丈夫重天機知名未足稱更須慎其儀子負經濟才
綱紀正所持時來展才力豐年孰云遲此行既特達當

念居者思

張起田夫子歸自大梁見示近稿

白日色杲杲黃河鳴濺濺久客寡歡趣命駕且言旋入
門三徑就荒蕪歎息兩載空纏牽亟進門下老侯芭雨
窓檢點烏絲牋上言別後長相憶下言世路何偏仄飢
來驅我心惶惶襆被欲歸歸不得大梁道夷門側朔風
吹黃塵四顧轉淒惻未亥屠者耳人固不易測侯生送
公子死所亦奇特楚漢距廣武轉戰不遑息祖擊博浪
錐祖龍魂戰慄翩然凌八垠大索空十日英雄事安在

憑弔淚沾臆操舟近南下暫憇荆山傍良璧不世出于
載埋光芒胡爲自炫鬻則足再罹殃抱璞處亂世韜晦
固其常嗟乎師言乃如此風塵攘攘枉爾爾惟有山川
好風景收入奚囊供驅使夙昔所歷恍見之如遇故人
慰調饑案頭殷殷聲金石文采珊瑚光陸離師兮更放
越溪棹留得遊梁一卷詩

君山翫雪

玉龍下天關盤旋猛超軼舒身雷霆走掉尾雲氣襲大
塊神黯然陰精任呼吸北風鼓寒威太空漭颼颼同類

互感召閭闔邃幽墨東君鮮光耀鬱華自沉匿穹蒼非
無眼奸位失其職犬吠空狺狺虎豹若羈繫幽虬豁然
喜翩翩凌八極爪牙倏卷舒鱗甲恣蕩逸緣高善窺伺
附物成否塞出門無亨衢問途迷雙屐引領意不愜北
山良可陟行行強逍遙兀兀苦偪仄高高氣凌虛下下
心恐踣盤跚登其巔四圍峯萃嶽天地本自寬環顧何
太逼渺哉芙蓉城恍惚脚下失飛舞方未已萬象皆改
色或皎如涼月或明如初日或輕如絮颺或比如髮櫛
或亂如花篩或激如水澗或環如垂虹或迴如舞紱或

淡如飛烟或凝如壘礮或縷如刺繡或紊如散帙或違
如相背或近如相暱或靡如相摧或止如相抑或聯如
珠排或割如帛裂或仰視天表紛如機中織或俯視江
流迅如弩前鏑或近覩茲山卷石如戴笠或遠矚金焦
黛色如點漆曲磴自峇崑或如澗下泐古木自輪囷或
如架上筆或如樹始介昂然挺而擊或如鳥始飛矯然
驚而革或如隨風舞纖纖掌中立或如小窓語呢呢情
好密或如遊海眼雨過多瑟瑟或如起草根秋夜光熠
熠或自上而下乘勢如建篲或自下而上回風如轉縞

或如百萬衆皚皚列斧鑕或如數千耦紛紛藝黍稷或
如太古器情狀未鏤刻或如方春花果木皆華實或如
恆星墮或如鮫人泣或如遊絲浮或如鄉雲譎或如白
馬馳或如素車轆或如卷湘簾或如植玉節或如穿雲
鶻或如受風馱或如迴岩電或如垂天翼或如畫工幻
或如劒鋒拭或如飄落梅或如吹殘荻極目宇宙交誰
爲自傑出緬彼天際松千尋挺勁直鐵幹與霜皮後凋
洵奇特爾乃壓重勢千霄猥曲屈扶蘇少生意枝葉類
枯槁安得數十株支撐同突屹呀呀中林鴉啄腐矜飽

食狐狸穴丘隴囂囂氣亦得黃鵠遊四海浩蕩無與適
天邊少稻梁腹餒不得吃所以堯時雀冲舉竟塞默千
載乃一見世人誰能識天道至今日生理母乃熄盛夏
苦亢旱原野遍榛棘嘉穀久焦灼顛倒委溝洫入秋既
無禾來春愁無麥腐儒憫時艱中情恒紆鬱豈惟爲身
謀竊恐耗物力凶年無寧宇四郊鮮生植沍寒忽洊至
挾纊難爲德哀哀窮簷民比歲何以卒乘風叫九閭杳
冥不我即以茲罹百憂轉輾填胸臆大道猶轉環否泰
朕兆析藉非陰寒凝安得陽和入豐年臻上瑞何能辭

凜冽蓆帽雖云困栗烈差可敵鶉衣縱然敝猶未至袒
裼惟是囊無錢自顧覺羞溺登臨空發興豪氣此少戢
安覓貫酒資同志展良覲憶昔春申君張楚炫微績外
假得士名奸宄幾竊國殺身非毋望取禍自回惑一朝
歸黃泉千古終寥寂白楊何蕭蕭荒草彌惻惻不如生
前樂遑恤隙陰疾對此清世界庶以沁心魄繁憂來無
端情志未蕩滌觸景暫驅遣浩歌難盡悉

泛泖遇順風

仙人冉冉乘雲輶攜我汗漫凌滄溟乍看日照浪花白

不覺天隨草色青
鷗鳥浮沉亦自喜
棹歌欸乃幾時停
回首昨日不得意
惡風黑霧維沙汀

往鄧尉山探梅爲雨雪所阻

夙有探梅約茲行
奈若何船頭浪乍急
雨脚晝偏多衣冷
宜堅臥酒醒試浩歌
山靈應笑我蠟屐可能過
薄暮霰先集陰寒雪更加
爭春未衰歇老眼亂周遮
雲護千株影岩垂六出花
行行高興盡放艇且還家
昨夜月明下良朋話勝遊
暗香疑可挹冷艷孰爲儔
雨過半塘寺風吹羈客舟
今宵憶佳境有夢到羅浮

傾耳雞鳴後驚聞鳥語喧
花期今縱好山路滑誰捫世
事盡如此差池那可論
賞心在人境不異問桃源

送春

九十韶光曾不少
惟餘今日最堪憐
春風次第辭鶯粟
花事離披到杜鵑
欲留春住渾無計
強送春歸可奈何
梅子雨肥仍帶苦
原蠶絲盡不成蛾
百舌枝頭何語巧
楊花池畔獨身輕
顛狂只合隨流水
婉轉無如終失聲

早笋上番看成竹小麥初漸不作花懊惱東風太無賴
將春吹去到天涯

畢竟惜春成底事獨愁春去老相催可知今日猶春色
博得須臾笑口開

懶惰經旬不出戶閑來獨坐手揩頤雄心盡付三杯酒
花信消磨一卷詩

三月已破將四月明朝應不似今朝天邊春去誰人送
故倩狂風折柳條

物理細推行樂晚風光流轉恐相違三春此後無消息

好向江頭盡醉歸

登虞山絕頂

虞山高出吳山裏却畧雲屏突兀起地軸橫維廿里餘
面面青巒照白水劒門以上尤奇特鳥道翻空峯翠嶺
石磴惟留雲氣通山泉時洒客衣濕傳聞拂水過殿角
今見懸崖垂石泐扶筇直上最高峯決皆天際開鴻濛
便欲浮槎凌溟渤掛席焉知清興終

虎丘

昨日亦虎丘今日亦虎丘山形削如畫樹色清且幽劍

池深無底講臺在上頭其中巍然者云是萬歲樓時惟
春三月士女胥來遊椎髻飾卷髮粉黛艷明眸綺羅弱
不勝長裙頗修修酒肆間茶鐺位置多風流林杪發高
唱好鳥同鞦韆盤桓惜日短落日蕩扁舟涓涓二三尺
通津成小洲招手喚鄰船前溪有水不荅云淺可揭約
畧與此侔昨過崑山脚百里無清瀏味鹹色更赤蒲藻
鮮遊鯈或云海水入居民滋隱憂或云是旱徵水怪見
有由去歲苦愆陽四郊禾不收江北大饑饉拾稻充乾
餱 皇仁施粥糜救荒畫良籌民氣未蘇息天災毋乃

稠吳儂好遊冶飲食靡財求歸來三歎息浩歌寫我愁

丹陽道中口占

丹陽路高高入雲石磴樹杪不可分車塵馬跡空紛紜
勞勞亭南古如此我獨何爲心殷殷

火雲如傘日如血驅驅肩輿炙身熱牛溲馬勃何時輟
此月不雨田無禾觸目四野念騷屑

自顧此生三十強飄蓬無根隨風翔爭似誅茅三峰傍
青鞋布襪拾瑤草玉真攜手看相羊

金陵雜詩

不踏金陵道秋風動隔年艱難舊客路惆悵好山川去
去辭家燕蕭蕭抱葉蟬淹留此萬緒搔首意茫然
傳道朱衣使斜穿淮水通非關氣可壓直爲意無窮方
丈求靈藥粉榆起大風微聞地脉斷終古鬱葱葱
六代繁華地淒涼有故宮須臾看失馬若箇善藏弓蒼
蘚平臺在浮雲舊墅空歎懷謝太傅把酒對西風
佳話聞桃葉扁舟蕩槳迎至今問渡處猶喚美人名窄
扣蠻靴穩長嘶玉勒輕風塵時瀕洞淥水獨盈盈
宿草荒荒白揚旗獵獵紅轅門初置艾太史正吹銅西

北兵戈急東南杼軸空鯨鯢幸息浪薄海祝堯封
虎踞依天塹龍升傍鼎湖不聞改朔服下詔禁樵蘇
水尊文祖周庭拜禹謨江東舊耆老涕淚洒平蕪
舊肆寒江外當壚大道旁石欄回曲砌繡幕罨垂楊
金粉朝朝麗華燈夜夜張千秋蕢酒處空說落星岡
莫謂客途倦茲行多賞心玄風暢焦贛健筆愛陳琳
發興自我始裁詩共爾吟日攜予季往到處有清音
時與
廣期舍
弟同遊
最愛臨江勝無如燕子磯秋濤來易盛山翼塌還飛

吼因風急魚衝逆浪歸遊雲何處宿點點落征衣
解纜苦促迫秉燭何逡巡路迴弘濟寺殿插大江濱石
角留微月山腰絕點塵何當結茅屋地僻往來頻

和借上人華亭雜感原韻

涼颼颯吹庭樹老去逢秋不耐驚鍛羽孤鴻號舊侶
過時反舌闕新聲賞心有夢迷春草高會何人續夏盟
三徑久荒少過客非關懶惰薄浮名

從來不識高僧面雲水飄然踪跡奇欵我柴扉寧有意
投人詩卷亦奚為道心欲認庭前栢世路空沉水底碑

留滯此間破兩月蕭蕭布衲朔風吹

竭來重訪華亭路欵乃前催蕩漿船風雨恰當九日後

交遊不似六年前擅場畫手留殘墨

陳彥達

細律詩人剩

短箋

董樗亭

最是荒原多宿草薤歌一曲恨綿綿

我亦京華常旅食秋風欵段賦遄歸參差渭北千山樹
濩落江南一布衣四海風塵鴻鵠倦故園蝥賊稻梁稀
可知客路多憔悴錫杖於今莫浪飛

上人性癖愛山水瓢笠來往峯泖鄉到日楓林未全赤
去時菊蕊仍留黃可憐握手臨岐路相思明月照短墻

區區此心何以致詩句不足贈奚囊

和陳岸嵐客歸過訪見贈之作

飄蓬昔逐浮雲去朔風吹之墮我前到家似客非虛語

憐我到家反似此日相逢豈偶然對君不敢作白眼顧

客岸嵐舊句也我何日老紅泉繭絲牛毛復何有慚愧荒蕪到硯田

浪打蓬飄已十年暫歸冷語草堂前頭顱老大還如

故兄弟相逢亦偶然眼見長饒荒稼圃夢思短褐傲

林泉石壕夜半誅求盡猶喜

曾無負郭田岸嵐原唱

華鄂堂詩藁卷二

古婁周彝策銘

放艇



季春餘寒氣風雨時瀟瀟桃李乍舒英柳眼垂長條明

發放小艇將汎浙江潮東甌從此去千里不憚遙此身

困泥塗所志凌雲霄聞多佳山水可以滌煩囂登臨饒

逸興一葦任飄飄

曉望西湖諸山

結想二十載脉脉不可親推窓矚天末今朝見故人

登天竺峰遇雨

將赴天竺峰健步若超距行行至山脚回首復延佇蘿
緣石磴攀鳥共松風語盤桓曾幾時日色已亭午樹杪
密雲興谷口迅飈吐須臾驟雨降溪流亂飛舞沾濡客
衣涼佳景不暇取躡屐彌逡巡趨趨瘁筋膂歡賞未云
畢樂事多所苦古來賢達士獨行恒踽踽窮途不須嗟
先則庶無忤

湧翠堂坐雨

敝裘難禦三春冷客裏家中一例看莫怪今朝天復雨

由來吾輩骨常寒

白雲堂

在天竺峰頂

白雲本是山中有素衣忽變爲蒼狗山中之堂號白雲
烟霞戶牖嘗相守我登白雲堂偏怪白雲多淫潦漱松
壑巨津連山阿西湖咫尺不相見過眼韶光轉瞽眩欲
誅雲師手無刃朝夕群遊飛片片白雲來今嘗彌天白
雲去今若流電山頭蒼蒼新月吐詰朝和風弄鳥語青
鞋竹杖重回首白雲之堂自終古

飛來峰

遙望靈鷲峰山色何崔嵬嵌空太古石雜沓成雲雷老
松披龍鱗長根走其隈下有無底洞白石四角撐鍾乳
晝夜滴雲氣常滌洄得非金泥簡守以老蛟螭恐是桃
花源俗子何能窺仰視蔚藍天劃然山頂開始知造化
功剗削無鑪錘相傳自西域冉冉空中來神物不可知
乍信還復疑欲去不忍別徐步恣徘徊

冷泉亭

步出深洞口有亭復翼然隔澗絕人行危嶠未可攀信
足回舊路溪聲何潺湲非風松偏籟無弦琴自彈坐久

客衣涼沉思俗慮湔安得炎暑時赤脚踏流泉晞髮讀
離騷少飲即醉眠寄言熱中人此處得神仙

靈隱寺

招提跨崇崗山門俯遠壑神境天上開弘規世不數虹
霓迴棟頭雲氣生殿角微升蔽日月高飛墮燕雀璀璨
列金碧輝煌飾丹雘世尊坐獅象古佛垂纓珞兩行接
長廊左翼竦傑閣曲曲氣蟠空巍巍勢若削寮房皆止
靜白日足寂寞洪鐘鳴朝暮方丈地寬綽步入香積厨
驚看古銅鑊炊飯可十石煮羹有萬勺是節屆清明衆

僧禮幽魄喃喃並膜拜默默自忖愜若無師主持焉得
寺恢廓謂巨德白業克不朽緇衣如可作 至尊駐玉輦
野外供茗杓賜名曰雲林御墨光於爍配此氣槩雄無
憂象教弱吾聞色即空何分豐與約入山不用深無昧
安有覺回身好風吹閑數松花落

放生池

沿湖白石赤欄橋冉冉凌虛勢次寥應有老龍潛海眼
空餘落日映山腰悠然自適江河永若箇翻愁雲雨遙
即此便知極樂處濠梁日日好相招

孤山

山中昔處士寄情梅與鶴超然致不羣世網獨脫畧茲
山本名孤千載兩寂寞

六一泉

茲泉名六一雅為歐公有英俊處下僚道廣志不偶寄
情山水間不啻若敝帚後人有餘思傳說不去口兼祠
四賢人落落與之耦有明當未造厄運在陽九清流半
屠戮烈烈爭質首俎豆各山中繩武先哲後當時失意
人千載竟不朽忠魂萃一堂儼然若師友百世而上下

庶幾兩無負

虎跑泉

性空演法地僧衆苦病渴杖錫將遠遊永與茲山訣夜
 夢神人語戒行師無缺山靈久蒙休胡爲輕棄絕當移
 南岳泉至此供飲啜詰旦有二虎拏攫山阿裂清泉倏
 迸流湛湛香且潔有僧自南來觀井心恍惚衡山童子
 泉近者忽已竭始知至誠感覺夢了無別我來山中遊
 下流聞幽咽方塘涵遊鱗蒲藻半明滅清源可用汲客
 子情歡悅寺僧頗解事知我中氣熱烹以龍井團味此

彌清冽捫讀坡公碑詩句非詭譎東坡詩有虎移泉眼
 趨行脚之句刻石存

遊湖心亭

薄暮離山門前溪印明月
 波光灑激山色青客子放棹湖心亭昔者遠眺不得至
 闌風長雨水冥冥西湖風景夙緣淺昨非今是心叮嚀
 舟人歎乃蕩槳亟四天無雲日初昃錦纜牙檣一葉輕
 繁花細柳情何極水氣英英浸山盛膚寸倏與長天亘
 對面不識浣紗人當窓頓掩凌粧鏡蒼堤宛宛起臥龍
 樓閣影動隨天風海客槎犯斗牛渚瀟湘夜泣帝子宮

晚來霽色少空濛扣舷四顧且推篷人生行樂安有恒
頃刻喜懼頻相仍

山頂松

森森山頂松浙浙澗中水挺出能幾何頽墮竟如此高
下隨所命努力從今始參天亦分內磊落未有止

沂江

大江之水日東流洪濤沆漭無時休來如萬馬注長坂
洄如飛雪舞山頭怒如猛士挺霜戟迅如天末卷蚬虬
乃今始知四瀆外功力豈不爭相侔是時霖雨輒旬日

水勢泛溢春江樓野田漂沒浸廬舍居民咨怨聲啾啾
我謂雨師何不仁如此豈獨蒼生憂雷聲憑憑日色死
天公黠慘爲之愁恒雨肆虐非細事疾召屏翳不少留
穹蒼四垂靜如洗山色青空類素秋舟人歛乃棹謳發
好鳥遙和鳴鈎輈高浪攤錢白日穩惡灘捩柁一葉浮
雲水蒼茫何處宿側身天地此孤舟

富春渚

扁舟泊枉汜寂寞若空谷杖策思躋攀四顧鮮平陸油
油岫上雲森森水中木瀏瀏澗有泉浩浩山無麓氣候

昧昏旦兀坐苦羈束緬思昔遊人風景殊肅穆奚事多
感傷眷言媚幽獨

釣臺

子陵好名人隱見桐江曲羊裘動物色倨傲加帝腹比
踪箕穎間毋乃恐局促何事千載後虛聲震聾俗荒臺
無人登蕪碑不敢讀怛悼逐風塵赧顏對芳躅子陵得
其清世人居其濁清濁雖異趨名心共馳逐古來考槃
人獨寐矢勿告

獨立

獨立蒼江上悠然歷翠微灘邊漲野色山外卷天衣春
日半去住鳩聲有是非明朝渾未定相對惜殘暉

白鷗

白鷗冉冉去羨殺野情高無復凌霄漢終然惜羽毛銜
魚啄古木沒水立前臯世上多矰繳紛紜漫爾勞

廢橋

曉發金華道問津激水傍洪流空浩蕩欲濟愁無梁借
問此石橋毀折何無良云自十三年寇盜聚此邦中宵
刑白馬軟血氣飛揚據險拒官軍焚橋以自防維時李

中丞仗鉞臨岩疆車中無絕鞞行間有缺折脅從不盡
殺群小什且僵流離得復業民氣漸樂康廢蹟難驟舉
綱紀日以張至今麾渡處遺愛猶甘棠嗟彼東陽民喟
然春陵行

遣興

山中有古松一旦化爲石鬱鬱自後凋岩岩無改色懿
此變態殊本性固不易
天際有蒼鷹一旦化爲鳩人猶憎其眼彼不虞有秋變
而之不仁嗟哉復何尤

雨中春樹萬人家

永康道中賦

碧嶂層層合青溪脉脉斜山原無空大春色自周遮久
雨過寒食疎林蒂落花蒼皮潤冰雪修幹走龍蛇荏冉
綠將老扶蘇翠欲加銜泥濕飛燕聒耳鼓新蛙棟宇生
雲氣庭除接水涯偶然開錦繡終是鎖烟霞渭曲人如
此輞川興未賒長途變朝暮留意數桑麻雞犬空中吠
籬籬靜不譁行行越山頂隱隱即仙家

由黃龍山至東渡

衆山皆跛陀黃龍獨萃嶺翠屏天邊開石根雲際立深

洞廣萬丈風磴通門闔緬彼山阿人薜蘿手自緝白日
松風寒渺渺不我即路過縉雲縣山色尤秀出萬木筆
牀下俗呼筆架山陰陰踈復密一泓山脚間曲曲流不塞崇
岩杳而深古道紆且直茅店三四間居民何逼仄數年
前喪亂盜賊此其窟吁嗟乎蒼生到今未蘇息野田半
荒蕪荆棘生溝洫客子挹清暉莽然餘景色去去登前
途日暮投宿急

桃花洞

漸漸洞口多欹石冉冉山頭起亂霞引得行人入迷路

等閒何處覓桃花

過嶺喜晴

每日陰雨愁不歇今晨淑景忽相催千盤黛色明於畫
百道泉聲吼似雷徑是人從天上過花香風向日邊來
巖前茅屋如堪結汗漫何須遍九垓

石帆

片帆高掛大江滸擊汰中流破暝霧鐵鎖銜沉兩岸山
漁歌唱徹千岩樹仙人鼓柁指蓬萊織女迴車引征路
雲來冉冉凌滄洲日出猶然古渡頭便欲乘之汎溟渤

長風無力空予愁

石門

重門誅蕩天中開路紆徑昃雲水隈悞疑岩頭懸足練
有時蜃氣成樓臺橘州田土無磽确桃源人家絕塵埃
雨過階除淨如掃白沙錦石縈青草安得移置几席間
極目蒼茫看不了

青田

青田有佳石丹篆供鏤刻珍重璠璵姿規模太古式初
時藏深山魄然雜瓦礫當世無識者誰爲慎剖析古來

英雄人脫畧少物色往者劉文成仕元鮮奇特提舉久
浮沉嘔血幾自賊一朝遇英主勲名首開國帷幄借前
箸折衝無強敵薄賞縱不酬丈夫志已得感誦趙公語
千載淚沾臆

華蓋山

杖策尋勝地絕壁依城隅俯瞰大江流勢與風雲俱嵐
擁失古樹雨過叫老狙雲梯洵可登樵徑倏若無魏亭
冠山巔翛然氣凌虛憑欄四顧盼羊腸多崎嶇宇宙自
廣大何地置腐儒穆穆竹辭籜飄飄花妥鬚此焉足靜

觀萬物樂有餘人生貴適意何事長欷歔

蒙泉

清泉迸石罅鑿鑿同盤盂氣味芳且潔香美勝醍醐
居人持木瓢斟酌隨所需一日輒數石澄鮮有餘儲
惜哉處僻遠洵美徒區區茶經留品藻大約在通衢
行潦供挹注潢汗人共趨茲泉不得地棄置等溝渠
清流自涓涓湛然終不渝

春草池

越中名勝地山水相鈎連崇崗迭起伏清流互洄漩
雲

門吼瀑布百丈落紅泉茲池本細流位置亦天然
曲曲

抱危巘依依對中川孤嶼石橋帖水面差通蕩槳船居

人遶其隈得非近神仙流觴久寂寞青草徒芊芊
石壁過雲見松杉倒影懸賞心竟安在揮手謝清漣

謝客巖

步履訪名巖遙矚若卷石徐行到山腹層巘頗逼仄
磴紆鳥道隱徑轉蚕叢劃攀緣至上頭回首纔咫尺
石理方且碎突兀見山骨廢亭址尚存廣衍草可席
漠漠川色黃油油雲氣碧潛虬姿多媚飛鴻響未歇
放情宇宙

間俯仰自怡懌嗚呼昔遊人千載良不隔

題別駕俞公官齋壁

大地此將盡客途興轉長釣竿拂東海樽酒對西堂在堂
郡出岫雲窺戶補籬花殷床相看足幽事天未意難忘

醉歌行呈廣文胡兼山先生

憶別先生近八年辰星梁月心惓惓永嘉孤嶼竄瀕海
錢塘怒濤空蹴天今夕是何夕把臂共浮白四筵列華
饌舉箸頻勸客當食忽三歎欲語氣填臆水心堂前荆
棘滿堂在婁署東偏婦翁葺為燕賓之所予鸞凰側翅
自己未與先生周旋其中至甲子言別

遭彈射爭似先生首宿齋左圖右史對青壁風流雲散
少經過且須痛飲靡有他先生矍鑠猶如此賤子老大
當如何

海舶

丁丁伐木甌江上入水新成萬斛舟惡浪黑風應不作
今朝鼓舞醉陽侯

異縣頻年愁米少此鄉歲稔米嫌多浮江越海尋常事
盤石村前白晝過

吳絲蜀錦杳不至日日輸粟出江灘故老為言昔遭旱

居民無處覓盤餐

飄飄麥信風無定振柁長年態自如舉網滿船皆石首
錦鱗撥刺一鮒魚

縣官權鹺有常額居民喫淡不嗔嫌煮海熬波無用處
却教漁戶販官鹽

眼見二舟同入海一舟今日獲生還家人個個倚閭望
捕得魚來索換錢

黃柑紅橘天下無風俗賤近無人須乘風當致大都會
何爲隱約困泥塗

我來永嘉苦跋涉水陸經月離風塵故鄉鄰人忽到此
屈指出門不一旬

入山舊諾行將踐浮海今朝路欲迷避俗竟須甘猛虎
乘風底事畏鯨鯢

鉤醬蠃珠常作貢扶桑弱水欲浮槎頻年窮島妖氛靜
薄海車書正一家

遊江心寺一百韻

辛未三月晦我遊江心寺寺在大江中倉卒不得至渡
船小似梭洪流疾於駛清晨汎一葦萬頃任騰沸擊汰

凌晴空長年力羸羸漸去闌闌遠頓覺耳目肆孤嶼落
天邊峭壁雜青翠招提橫中間面面臨水次旁有兩浮
圖巒巒簪插髻杳然入雲漢決昔難平視維舟山脚下
徐步歷廣砌入門何軒昂靈境豁幽滯僧舍分兩行寮
房儼拱衛玉殿蟠虛無朕帶有餘致丹墀石髮長碧瓦
魚鱗細僧云是禪院爰自唐初真寺前有海眼老龍久
藏閉無端風雨交爛熳騰雲氣居民遭掀翻雷霆猝崩
墜金碧爲塵埃千載興復廢往者王龜齡弱冠於此憩
老僧禪定中知是龍再世晦明相周旋餽粥結恩義學

成將遠適匍匐求廕庇言此數畝宮君家舊有地祈發
捨宅願片紙留質劑王公妄許諾要言誓不貳泊乎先
生沒深潭復爲厲梵宇倏震蕩浩劫安可避喃喃呪洞
門舉火焚約契中川始晏然潛虬終古睡世尊蓮花臺
窟宅是其位聞言重狐疑錯愕神惴惴方外類齊諧誰
能究根蒂簷前清暉額有宋高宗賜天章爛榮光丹鉛
永附儷翰墨臻絕妙獨遺天下計長城輕自壞航海日
陵替子孫坐逼仄繼統立且蹶皇皇文信國秉均奮忠
毅丹心炳日月隻手奠大器時命天不與奔走重顛躓

九死不一生從容非慷慨我來謁祠下載拜肅冠袂松

杉陰風生棟梁白日曠拂拭碑版詩大書甚堅緻

文山詩蹟

勒石朗吟未及終泫然出涕泗誦讀聖賢書如是始無

愧砥柱立中流狂瀾障東逝懿此一卷石瞻仰等泰岱

忠魂棲危嶠億載不相棄遵途趨左翼巍巍高標植樞

衣登其巔氣象殊拔萃南望城郭中烟雲洄變飄居人

數千戶廬舍狀櫛比東顧極滄海蜃氣空中積或奔若

車馬或立若旗幟或竦若樓臺或直若埤坻山崗亘西

北星羅與碁置青天遊白雲點染同浮黛一曲羅帶圍

千攢劍鋒剗崇崖劃然斷鈎連仍迢遞翹首矚蒼穹春

光頗明媚鴟鴞登雲路顧盼矜猛鷲白鶴無風翔皎皎

空委翅鳳凰不相待沙岸慙失勢側頸訴九閻文采見

顛悴誰言視聽邇忽忽其如醉俯視江流水濤瀧日夜

繼一往何時返盛勢忽如寄捨紱辭舊路接武忘勞勩

古樹蔚交柯水滸彌幽邃冉冉野花飛齒齒巨石綴下

下鳥道翻高高蠶叢銳西偏多寶塔遠道心恐泥上階

賈餘勇勝覽期必濟風景自清和岩壑極深閔指點頃

所覩一一畧相配壯觀合兩美彼此無軒輕放情宇宙

交吾意庶幾遂不期暮景逼更值迅飈熾木葉自下搏
黃沙從空翳高鳥隨之墮羽毛縮如蝟恰衣乍飛旋雙
足頓搖曳况聞瀕洞聲弭節輒奔潰山椒增句磔谷口
漭飈颺得非瀟湘翻竊恐天柱毀翩然覓前途解纜即
鼓柁雷雨不復來風濤亦差退激文互洄合綺霞光烟
碎好鳥啼未歇輕舟過水滙古樹死間生行人經復緯
金盤青玉案落日萬山際蕭瑟客身涼盤桓筋力瘁人
生半順逆隨遇皆得意不見朝暮間陰晴多變態山水
有本性惟此常不敝耿介契夙尚臨風發長嘅豈徒弔

古今傳說聞見異登臨結夢思擬撰名山誌

登郡城

千盤萬折赴東甌城郭烟霞處處幽作客昔人皆潦倒
杖藜此地亦風流岩前霽色餘青草江上閒心對白鷗
却恨歸期太匆迫奚囊風景未全收

惜別

三月之二日解纜谷水濱冉冉離甌江屈指復此辰奔
走逾千里風雨過三春清晨頗和靄水石光粼粼野花
牽客衣山鳥解留人客子不可任欲別彌遠巡天台及

雁蕩觀面隔風塵纏牽坐惆悵夙願何由伸廣文胡先生老至情更親數載一相見後會如何因劉生實俊才寓詩句多清新一朝兩分手念此驚心神行矣各努力異地猶比鄰贈言及臨岐古道今未湮

海門玩月憶舍弟

忽忽月初出纖纖輪未安清光猶好在中夜共誰看驚鳥繞死樹洪流亂急灘扣舷久獨立自惜客衣單

蟋蟀

蟋蟀何太早發聲自岩扃高下相倡和囚依無時停孟

夏盛陽氣陰蟲出非經天邊變風俗異器同發型不見簷溜間箇箇添流螢將毋行役苦枕畔頻叮嚀勞人不能寐攬衣起復聽

採桑

初日照柔桑顏色殊沃若佳人執懿筐盈盈出閨閣轉盼流素波藻翹感金雀紅裙間縞衣雲鬟半約畧晨起畏蠶飢窈窕匪行樂邂逅目乍成逡巡步反却微詞不敢通高義自束縛遵途入重幃默默理由薄

茗溪

碧樹籠烟合斜橋罨水低閑來倚短棹到此近前溪艷
舞寂不作清樽晚獨携浮家隱桑苧咫尺白雲迷

雨中過泖橋

日色杳冥照東臯晨雨搖颺輕於毛燕子接蟲飛乍起
漁艇吹煙濕不高小麥將黃浪千疊新蒲正綠水半篙
鶯花轉眼今安在風檣轉側恐徒勞

研山十詠

以入天猶石色穿
水忽雲根為韻

明月峽

雲間周 彝寒谿稿

等韻
八
字
書

岷江之水穿三峽而下層巒疊嶂迴清倒
影七百餘里畧無斷絕而明月峽尤勝茲
石中峯高三寸許左二峰相連右一峰亭
亭獨立廣與高等兩旁多小坡細澗廣加
三之一厚殺其半石理純黑右峯之頂白
石一疆大如豆質極圓潤非假雕琢其外
壤有黑石相啣似微雲承月狀因以為名

岬東羊腸迴波跳虎鬚濕桂樹影團團山尖宛戴
笠湍船不可載鼓柁從此入

旃檀

予得此石於五溪之碣灘疑數千季樹根
濤瀧澆嚼而成骨理瘦削絲縷透露以刀
試之不能入方知其為石也廣二寸五分
高半之嵌寶玲瓏不可悉數色黃而黑嗅
之微有香氣故名焉

薰陸鷄舌根竒芬自西天千絲復萬縷結構空中
烟衽林多幻相想此亦偶然

穿山

辰沅之間有穿山焉重巖架空寬比厦屋
旁有石柱獨立溪澗相傳即馬伏波所穿
石窟也茲石意像與之酷似大如拳而虛
其左偏右偏無竒峰多細縐云

穿山狀何似雲水相綢繆溪流中貫之一棹恣夷
猶咄咄相告語別來已三秋

獨醒石

昔李文饒平泉莊有石醉時倚之輒醒楊
康功藏一石如醉道士狀東坡為之作歌

石山言
同一石也或醉或醒其不同固如此歟是
石滄洲陳太守所遺高二寸有半凝然端
立如人之拱而翼者滄洲飲酒多而不亂
爰錫茲名以誌良友之贈云

王績戀二升淳于嗜一石石丈咲而言嗟哉餽糟
客小戶解看人至理不我易

獅巖

巖長一寸高得三之二焉乃諸石中最小
者回頭掉尾酷肖獅形

食席負殊能搏象有餘力蹲伏不一試莽然帶睡

色虛谷將投老爪牙誰能識

青鸞

鸞之為狀鷄頭燕頤蛇頸魚尾茲石最為
神似色深青故以青名頭高一寸有半尾
二寸周身有紋茸茸然頸細而縮翼坦而
垂尾翹而直殆鸞之棲者歟

女牀有竒翮佐鳳太平年和鳴黃鍾應妙舞青雲
穿槐根縱堪栖鬱鬱冷踈烟

石芝

東坡石芝詩二首所歎詫為希有者乃肉

芝而石芝情狀初不之及予所獲信為石
芝無疑蓋厚一寸有奇廣倍之下有曲莖
如蓋之厚色正紫又名石桂英云

仙家有大藥玉芝變神水生之超凡骨詎敢希不
死煌煌九光姿摩娑儘足喜

積翠

一石色純綠視明月峽差小高與之等空
中秀外幽巖邃壑不可摹繪中天積翠石
勢參差杜子美寄興漁樵便思終老子庶
幾神遊焉

陂陀湧翠微天際一螺髮海風吹神山雲霞互飄
忽予欲從之遊壺中伸手挈

鷄背嶺

黔中鷄背嶺險峻極絕曩予因於登頓作
詩紀之至今追憶猶令神悸何所愛而以
之名石特取其形似而已高廣二寸餘首
尾胸翅纖悉畢具足立石上挺然屹然惟
不露爪距耳

十日養未足五德昔所聞何時臚臚聲高唱入青
雲塊然尸鄉叟跚跚爾為羣

石山一記
小飛來峰

高不滿二寸廣稍殺中峰秀出而空其腹
後別有峰障之旁列層巘瀑布界道廻環
窈窕勢絕復通其麓左實右虛虛處石尖
倒垂如滴乳狀殆遍得之最後故以為諸
石之殿

何來一卷石附土無纖根夭矯龍蛇走蒼茫雷雨
翻買山計未就為卜小丘園





江蘇巡撫

藏書